

Inatsisartut suleriaasianni § 37, imm. 1 naapertorlugu Naalakkersuisunut apeqquut imaattoq matumuuna saqqummiuppara:

Naalakkersuisunut apeqqutit:

1. Housing First-imut periusissiaq naapertorlugu suliniutit 13-it qassit naammassineqarsimappat?
2. Suliniutit suut naammassineqarsimanngillat, aamma sooq naammassineqarsimanngillat?
3. Suliniutit suut kinguaattoorsimappat?
4. Suliniummut ataatsimut immikkut aningaasat qassit atorineqarsimappat?
5. 2023-miit inuit angerlarsimaffeqanngitsut qassit ataavartumik inissinneqarsimappat?
6. Housing First qanoq nalilersorneqartarpa?
7. Inuit angerlarsimaffeqanngitsut inatsisinik unioqqutitsisumik tuperni imaluunniit assingusuni najugaqartut taakkua peerneqarnissaannik piumaffigineqaraangata, najugaqarfissaannik neqeroorfigineqarnissaat Naalakkersuisut qanoq iliornikkut qulakkeerniarlugu aalajangersimasunik suliniuteqassappat?
8. Kalaallit Nunaanni innuttaasut inissamik pisariaqartitsisut Danmarkimiit suliaartortitanut inissanik agguaassisoqarnerani ajornerusumik inissinneqannginnissaat Naalakkersuisut qanoq qulakkeerniassavaat?
 - a. Naalakkersuisut isumaqarpat taamatut pingaarnersiuisarneq Housing First-imut periusissiaq anguniagaanut naapertuuttusoq?
9. Naalakkersuisut ilisimasaqarpat kommunit nunaminertanik atugassiissutinik atuukkunnaarsimasunik aammalu nunaminertanik inatsisinik unioqqutitsisumik atuinernik Inatsisartut pilersaarusiornermut nunaminertanillu atuinermut inatsisaanut naapertuuttumik aaqqissuussaasumik nakkutilliisarnerannik? Aamma Naalakkersuisut kommunini nunaminertanik atugassiissutit atuukkunnaarsimasut qanoq amerlatiginerannik ataatsimut tamakkiisumik nalunaarsugaqarpat?

- a. Naalakkersuisut suliniuteqassappat kommunit nunaminertanik atugassiissutit atuukkunnaarsimasut pillugit nalunaarsuiffitsik nutartertarnissaat qulakkeerniarlugu, taamaalillutik nunaminertat naleqquttut sukkanerusumik atorneqarsinnaaleqqullugit, ilaatigut inissialiortitsinermut isumaginninnikkullu suliniutinut, tassunga ilanngullugu Housing First-imut?

10. Naalakkersuisut ilisimasaqarpat kommunit innuttaasut angerlarsimaffeqanngitsut imaluunniit angerlarsimaffeqanngilernissamut ulorianartorsiortut pillugit ilitsersuisussaataitanertik paasissutissiisussaataitanertillu naammassisarneraat, tassunga ilanngullugit innuttaasut pisinnaatitaaffimminnik, naammagittaalliornissamut periarfissaminnik kiisalu taparserneqarnissamut periarfissanik naleqquttunik ilisimatinneqartarnersut?

- a. Naamiuppat, taava Naalakkersuisut kommunit pisussaaaffimminnik naammassinnittarnissaat qulakkeerniarlugu suliniuteqassappat?

(Inatsisartunut ilaasortaq Jens NapãtôK', Naleraq)

Tunngavilersuut:

Naalakkersuisut 2023-mi angerlarsimaffeqanngitsuuneq pillugu periusissiaq "Kikkut tamarmik pitsaasumik inuuneqarnissamut pisinnaatitaaffeqarput" saqqummiuppaat. Periusissiami ilaatigut suliniutit 13-it kiisalu Housing First tunngavigalugu misileraalluni suliniut ilaapput. Ukiut pingasut qaangiunneranni sulit inoqarpoq angerlarsimaffeqanngitsunik, ilaatigut tuperni najugaqarlutik, peqatigitillugulu sumiiffinni arlalinni oqartussaasut inatsisinik unioqqutitsisumik napparneqarsimasutut toqqit peerneqarnissaannik piunasaqartarlutik.

Taamaattumik suliniutit suut naammassineqarsimanersut, angusat suut anguneqarsimanersut kiisalu periusissiaq qanoq nalilersorneqarnersaq ataatsimut nassuiarneqarnissaat pisariaqarpoq. Tamanna immikkut pingaaruteqarpoq inuit angerlarsimaffeqanngitsut najugaqarfii peerneqannginnerini isumannaatsumik ataqqinartumillu allamik najugaqarfissamik neqeroorfigineqartarnersut eqqarsaatigalugu.

Kalaallit Nunaanni angerlarsimaffeqanngitsuuneq isumaginninnikkut ajornartorsiutaannaanngilaq, aammali inuit isumannaatsuunissaannut peqqissusaannullu

tunngassuteqarpoq. Inuit aalajangersimasumik angerlarsimaffeqanngitsut ullut tamaasa nillermut, sialummut, anorimut silallu allanngorartuuneranut eqqugaanerpaasarput, tamannalu peqqissusaannut kingunerluuteqarsinnaallutik, ajornerpaamillu pisoqassappat inuunerannik navianartorsiortitsisinnaalluni.

Toqqit imaluunniit utaqqiisaasumik najugaqarfiit allat peerneqarpata, peqatigitillugulu isumannaatsumik ajunnginnerusumilluunniit allamik najugaqarfissamik innersuussisoqanngippat, inuuniarnikkut ajornartorsiut sulii ajornerulersinnaavoq. Taamaattumik pingaaruteqarpoq paasissallugu Naalakkersuisut Housing First-imut periusissiap anguniagai qanoq iliorlutik aaqqiissutissanut aalajangersimasunut allanngortissaneraat, pingaartumik inuit ullumikkut immikkut ulorianartorsiortillugit inissisimasut eqqarsaatigalugit.

Peqatigitillugu inuiaqatigiinni maanna oqallinnermi Kalaallit Nunaanni inissianik pingaarnersiuneq pillugu apeqqutit qaffakaapput. Oqaatigineqarpoq Danmarkimiit suliaartortitat piffissami sivikitsumi inissamik atugassinneqarsinnaasimasut, kalaallit innuttaasut sulii inissamik pissarsinissaminnut annertuumik ajornartorsiuteqartillugit. Taamaattumik pisariaqartuuvoq paasissallugu Naalakkersuisut taamatut pingaarnersiuneq qanoq nalilerniarneraat Housing First-imut periusissiap anguniagaanut tunngatillugu, tassalu inuit angerlarsimaffeqanngitsut ataavartumik inissamik pissarsinissaannut ikiorneqarnissaat eqqarsaatigalugu.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.